

詩
氏
族
考

詩氏族攷敘

詩雖吟詠性情而政治之昇失風俗之盛衰與夫山川谿谷禽獸艸木之類罔弗賅備而於頌美風刺則繇今已至徃古或直顯言其姓氏或隱斥其人而小序明揭之者其人之賢否善惡舉皆可攷見而知之顧艸木蟲魚則有疏名物則有解地理則有攷而詩中所傳之人則未有纂緝成書宋王質詩總聞有聞人恐亦略而未詳也伯兄引樹學博精淡詩學因取詩人之氏族名字博攷經史諸子及近儒所著述并剏國之世次泊其人之行事莫不按羅薈萃而詩人美刺之意旨益可得而觀感焉孟子曰誦其詩讀其書不知其人可虐蓋知

其人卽可呂論其世而興衰正變之端治亂存亡之故亦繇此而愈明是則斯攷之有餽詩敎視夫艸木蟲魚諸書其所繫爲尤大洵足呂傳於後而無疑矣

道光十有五季歲在端蒙汁治壯月同裏弟富孫謹敍

詩氏族考卷第一

嘉興 李超孫 輯

周南

關雎

后妃 小序

按后妃太姒也首章君子好逑蓋思得淑女以爲后妃之助若以淑女爲后妃君子爲文王則失之矣考大戴禮文王十五而生武王前此已有伯邑考計文王未取后妃之時年尙幼冲宮中乃先有琴瑟鐘鼓與夫宮妾之盛且思其配至于展轉反側毋乃邇色之蚤乎郝氏敬辯之最爲確當

召南

采蘋

季女

毛傳尸主齋敬季少也

鄭箋使季女者成其婦禮也

何楷詩經世本古義序采蘋美邑姜也古者婦人將嫁教于宗廟教成有蘋藻之祭武王元妃邑姜教成能修此禮詩人美之齊讀如字言有齊季女齊國名太公之先所封國也太公本齊後仍封于齊當武王爲西伯時以女邑姜妻武王計其時太公年已老則邑姜之爲季女無疑左傳襄二十八年公過鄭鄭伯有廷勞于王崖

不敬穆叔曰敬民之主也而棄之何以承守濟澤之阿
行潦之蘋藻實諸宗室季蘭尸之敬也所謂季蘭意卽
邑姜之名不可知而其言濟澤之阿則尤齊地之證據
讀齊爲齋誤矣二南之詩爲太姒詠者不一而足太姜
太任亦再見于大雅邑姜開國聖配獨無一詩及之乎
按何氏以季蘭卽邑姜名固不可臆定至謂太公年
老邑姜爲季女齊讀如字以濟澤之阿證齊地似有
足據姑存其說

甘棠

召伯

古今人表列上中作召公

鄭箋召伯姬姓名奭食采于召作上公爲二伯

說文奭
燕召公

名讀若邦史篇名
醜路史又名顯

白虎通召公文王子也

史記召公奭與周同姓姬氏周武王滅紂封召公于北
燕其在成王時召公爲三公自陝以西召公主之自陝
以東周公主之召公之治西方甚得兆民和召公巡行
鄉邑有棠樹決獄政事其下自侯伯至庶人各得其所
無失職者召公卒而民人思召公之政作甘棠之詩
韓詩外傳昔者周道之盛召伯在朝有司請營召以居
召伯曰嗟吾以一身而勞百姓此非吾先君文王之志
也于是出而就蒸庶于阡陌隴畝之間而聽斷焉召伯
暴處遠野廬于樹下百姓大說耕桑倍力以勸于是歲

大稔民給家足其後在位者驕奢不恤元元稅賦繁數
百姓困乏耕桑失時于是詩人見召伯之所休息樹下
美而歌之詩曰蔽芾甘棠此之謂也

說苑召公述職當桑蠶之時不欲變民事故不入邑中
舍于甘棠之下而聽斷焉陝閒之人皆得其所是故後
世思而歌詠之

逸齋詩補傳武王克商封黃帝之後于蓊召卽蓊也後
改爲燕故太史遷謂武王封召公奭于北燕然則蓊之
爲燕猶唐之爲晉荆之爲楚或曰黃帝之後封于蓊者
已絕成王更封召公奭于蓊爲燕猶封微子于宋以繼
商後也皇甫謐以召公爲文王之庶子信如其說則周

言上放卷第一
三
公召公蓋兄弟也成王封周公于魯既以元子伯禽代之而留周公爲師則封召公于燕亦必以元子代而留召公爲保矣

世本古義召地召公奭采邑也史記燕世家云與周同姓皇甫謐云文王之庶子勝殷後封于北燕留周佐政食邑于召輔成王康王卒謚曰康長子繼燕支子繼召按左傳富辰言文之昭十六國無燕似不足信豐熙以爲王季庶子不知何所本也

毛詩集解李樛曰召公爲伯乃是武王之時此稱爲伯者亦當追稱之耳

竹書紀年康王二十四年召康公薨

論衡召公年百八十

風俗通召公壽百九十餘乃卒

括地志召伯廟在洛州壽安縣西北五里

清白士人表攷召采地又作邵名奭死諡康呂氏春秋
曰保召公易林曰姬奭楚辭曰燕公

按燕世家云召公奭與周同姓孔安國鄭康成說皆
同正義第二云武王之時召公爲西伯爲伯武王時食
采文王時唯皇甫謐謂召伯文王之庶子論衡亦云
周公兄陸德明云左傳富辰言文之昭十六國無燕
未知士安之言何所據又繹史世系圖云召亦同姓
或云卽郇伯亦文王之子然郇召當是二人不得混

合而士安之說爲可從也

何彼禮矣

王姬

陸德明曰王姬武姜姬周姓也

正義曰王姬者王女而姬姓春秋築王姬之館于外杜預云不稱字以王爲尊是也何休云天子嫁女于諸侯備姪娣如諸侯禮義不可以天子之尊絕人繼嗣之路皇甫謐云武王五男二女元女妻胡公王姬宜爲媵今何得適齊侯之子何休事無所出未可據信或以尊故命同族爲媵

容齋隨筆春秋莊公元年當周莊王之四年齊襄公之

五年書王姬歸于齊莊公十一年當莊王之十四年齊桓公之三年又書王姬歸于齊莊王爲平王之孫則所嫁王姬當是姊妹齊侯之子卽襄公桓公二者必居一于此矣

詩補傳據春秋所書魯莊公元年及十有一年冬皆書王姬歸于齊實平王孫女嫁齊襄公桓公也嫁桓公者傳謂之恭姬則肅雝可知矣

世本古義春秋魯莊公十有一年冬王姬歸于齊時周莊王之十四年也左傳齊侯來逆共姬公羊穀梁傳皆云過我也林堯叟云共姬卽王姬按左傳記齊桓公之夫人三王姬徐嬴蔡姬皆無子然則卽此王姬也桓新

有齊國任用管仲將興霸業而聯姻王室詩人美之
顧炎武曰知錄山堂考索載林氏云攷春秋莊公元年
書王姬歸于齊此乃桓王女平王孫下嫁于齊襄公非
平王孫齊侯子而何說者必欲以爲西周之詩于時未
有平王乃以平爲平正之王齊爲齊一之侯與書言甯
王同義此妄也

平王 齊侯

詩補傳先儒以文王爲平正之王猶書以爲甯王也旣
以平王之孫爲文王之孫遂以齊侯之子爲齊太公之
子殊不知武王娶太公望之女謂之邑姜則武王之女
謂太公之子乃甥舅也必無昏姻之理或者又謂齊侯

乃齊一之侯猶易言康侯終非確據

世本古義平王名宜曰孫桓王名林曾孫莊王名佗未知共姬爲何王之女齊侯之子謂桓公小白也小白父僖公名祿父兄襄公名諸兒桓卽位後三年王姬始歸齊時已將霸矣桓本非嫡而爲諸侯故本其所自而曰齊侯之子申培說則以爲齊襄公殺魯桓公莊王將平之使榮叔錫桓公命因使莊公主昏以桓王之妹嫁襄公攷春秋傳魯莊公元年爲周莊王之四年齊襄公之五年夏單伯送王姬秋築王姬之館于外冬王姬歸于齊公羊傳云天子嫁女于諸侯必使諸侯同姓者主之所疑者襄已爲齊侯五年似不應仍稱齊侯之子唯襄

弟小白亦娶王姬以內難得國故詩人本其父爲齊侯以稱之蓋許其繼統也獨惜共姬之賢無所考耳

按春秋兩書王姬歸于齊皆在周莊王時以世次上推則平王是平王宜曰齊侯之子不出襄公桓公此說當矣先儒以平正齊一爲解並非

邶風

柏舟

衛頃公

小序

古今人表列下上作衛頃侯

頃公貞伯子在位十二年諡法甄心動懼曰頃

朱公遷疏義頃公有賂王請命之事其諡爲甄心動懼之名如漢諸王必其嘗以罪謫然後加以此諡以是意

其必有棄賢用佞之失

按史記作頃侯云頃侯厚賂周夷王命爲衛侯旄邱
疏云案世家自康叔至貞伯不稱侯頃侯賂夷王始
爲侯又平王命武公爲公不恆以康叔言康叔之封
者以康叔之後自爲時王所黜頃侯因康叔本侯故
賂夷王而復之命武公爲公謂爲三公爵仍侯也許
謙詩名物鈔云史記謂康叔之子康伯六世皆書伯
至頃侯厚賂周夷王王命爲衛侯索隱曰康誥命爾
侯于東土又云孟侯則康叔已爲侯也子康伯卽稱
伯謂方伯耳非降爵也頃侯德衰不監諸侯乃從本
爵非賂王而稱侯也其說甚明

綠衣

衛莊姜 小序

鄭箋莊姜莊公夫人齊女姓姜氏

隱三年左傳衛莊公娶于齊東宮得臣之妹曰莊姜美而無子

史記莊公五年取齊女爲夫人

春秋疏莊姜齊莊公女僖公姊妹得臣爲太子蚤死不
言僖公姊妹而繫得臣者見其是適女也

列女傳齊女爲衛莊公夫人號曰莊姜始往操行衰惰
心淫佚冶容傳母見其婦道不正諭之云子之家世世
尊榮當爲民法則子之質聰達于事當爲人表式儀貌

莊麗不可不自修整衣錦褰裳飾在輿馬是不貴德也
乃作詩曰碩人砥厲女以高節女遂感而自修君子善
傳母之防未然也

仲氏

毛傳仲氏戴嬀字也

陸德明曰戴謚也嬀陳姓也

正義曰婦人不以名行今稱仲氏明是其字禮記男女
異長注各自爲伯季故婦人稱仲氏也

按衛世家云莊公娶齊女爲夫人好而無子又娶陳
女爲夫人生子蚤死陳女女弟亦幸于莊公而生子
完完母死莊公令夫人齊女子之立爲太子孔穎達

謂禮諸侯不再娶且莊姜仍在左傳唯言又娶于陳不言爲夫人世家云又娶陳女爲夫人非也左傳唯言戴嬀生桓公莊姜以爲己子不言其死云完母死亦非也言又娶者蓋謂媵也左傳曰同姓媵之異姓則否陳女得媵莊姜者春秋之世不能如禮竊謂史記固誤孔疏亦未之考

日月

州吁

小序

古今人表列下下作公子州吁

隱三年左傳公子州吁嬖人之子也有寵而好兵

穀梁傳州吁州又作祝

史記莊公有寵妾生子州吁十八年州吁長好兵莊公

使將石碯諫曰庶子好兵使將亂自此起不聽二十三年莊公卒桓公二年弟州吁驕奢桓公紂之州吁出奔十三年鄭伯弟段攻其兄不勝亡而州吁求與之友十六年州吁收聚衛亡人以襲殺桓公州吁自立爲衛君衛人皆不愛石碯乃因桓公母家于陳佯爲善州吁至鄭郊石碯與陳侯共謀使右宰醜進食因殺州吁于濮李縈曰衛定姜衛獻公之嫡母定公卒夫人姜氏旣哭而息見太子之不哀也不納勺飲歎曰是夫也將不唯衛國之敗其必始于未亡人及衛獻公之奔也定姜曰余以巾櫛事先君而暴妾使余則衛獻公之于母亦如州吁之于母也以衛之爲國而爲人子者多如此良可

怪也

按州吁以隱四年春弑立秋卽蒞殺于濮史與左傳敘殺州吁之事微異

擊鼓

孫子仲

毛傳孫子仲謂公孫文仲也

鄭箋仲字也

正義曰鄭謂子仲字仲長幼之稱故知是字則文是諡也國人所言時未死不言諡序從後言之故以諡配字也

世本古義孫子仲孫公孫其後因以孫爲氏子仲其字

序稱公孫文仲者文其諡也名無考時軍帥也

按春秋隱四年夏書宋公陳侯蔡人衛人伐鄭州吁以是年二月弑立至九月被殺竊國僅及八月而于夏卽糾三國伐鄭可謂佳兵黷武矣孫子仲序稱公孫文仲蓋是時大夫而爲將也

雄雉

衛宣公

小序

古今人表列下上作衛宣公晉

衛宣公名晉桓公之子在位十九年諡法聖善周聞曰宣

隱四年左傳衛人逆公子晉于邢冬十有二月宣公卽位書曰衛人立晉衆也

公羊傳晉者何公子晉也立者何立者不宜立也其稱人何衆立之之辭也然則孰立之石碯立之石碯立之則其稱人何衆之所欲立也衆雖欲立之其立之非也穀梁傳衛人者衆辭也立者不宜立者也晉之名惡也其稱人以立之何也得衆也得衆則是賢也賢則其曰不宜立何也春秋之義諸侯與正而不與賢也

世本古義案世家以宣公爲桓公子誤也今本世家以晉爲莊公之子桓公之弟亦未的疑是桓庶兄

按公穀俱以宣公卽位爲非正跡其上烝夷姜下納伋妻淫亂成風其穢德已概可見卒謚曰宣得不謂之誣美乎

旄上

衛伯

小序

正義曰衛伯衛宣公也案世家自康叔至貞伯不稱侯頃侯賂夷王始爲侯又平王命武公爲公謂爲三公爵仍侯也此云衛伯以知宣公非州牧而爲牧下二伯以周之州長曰牧以長一方言之謂之方伯

式微

黎侯

小序

說文黎作𪔐

水經注黎侯名陽

呂氏春秋武王封帝堯之後于黎城

路史黎子姓侯爵文王所戡者與紂都接

馬驕繹史黎侯祇存其爵不得而譜也 左傳魯宣公

十六年晉滅赤狄數之以其奪黎氏地與此脗合但彼在衛穆公時去宣公遠矣或黎氏世受翟害不得強合爲一事

列女傳黎莊公夫人衛侯之女也既往而不同欲未嘗得見其傅母閔夫人賢謂夫人曰胡不去乎乃作詩曰式微式微胡不歸夫人曰婦人之道一而已矣彼雖不吾以吾何可以離于婦道乎乃作詩曰微君之故胡爲乎中路終執貞一以俟君命君子故序之以編詩

按列女傳謂式微二人之作其後世聯句所自昉與

但其說與序大異未可據以釋是詩

簡兮

簡

按子貢傳謂邶之伶東心在王室焦弱侯云申公曰
東伶官名恥居亂邦自呼而歎曰東兮東兮汝乃白
晝而舞于此乎毛譌東爲簡然子貢詩傳申公詩說
雖僞書不足据考漢書高惠高后文功臣表遼東布
章師古曰東古簡字東簡二字本通謂毛譌東爲簡
亦非

二子乘舟

伋

壽

小序

古今人表並列上下作衛太子

伋公子壽

毛傳二子伋壽也宣公爲伋取于齊女而美公奪之生
壽及朔朔與其母愬伋于公公令伋之齊使賊先待于
隘而殺之壽知之以告伋使去之伋曰君命也不可以
逃壽竊其節而先往賊殺之伋至曰君命殺我壽有何
罪賊又殺之

正義曰傳言二子爭死之由與桓十六年左傳小異此
言愬伋傳言構伋子此言先待于隘傳言使盜待諸莘
此言君命不可逃壽竊其節而先往傳言壽子告之使
行不可棄父之命惡用子矣有無父之國則可也及行
飲以酒壽子載其旌以先此文不足亦當如傳飲以酒
也

史記初宣公愛夫人夷姜夷姜生子伋以爲太子而令右公子傅之右公子爲太子取齊女未入室而宣公見所欲爲太子婦者好說而自取之更爲太子取他女宣公得齊女生子壽子朔令左公子傅之太子伋母死宣公正夫人與朔共讒惡太子伋宣公自以其奪太子妻也心惡太子欲廢之及聞其惡大怒乃使太子伋于齊而令盜遮界上殺之與太子白旄而告界盜見持白旄者殺之且行子朔之兄壽太子異母弟也知朔之惡太子而君欲殺之乃謂太子曰可毋行太子曰逆父命求生不可遂行壽見太子不止乃盜其白旄而先馳至界界盜見其驗卽殺之而太子伋又至謂盜曰所當殺乃

我也盜并殺太子伋以報宣公乃以子朔爲太子

新序衛宣公之子伋也壽也朔也伋前母子也壽與朔後母子也壽之母與朔謀欲殺太子伋而立壽也使入與伋乘舟于河中將沈而殺之壽知不能止也因與之同舟舟人不得殺伋方乘舟時伋傳母恐其死也閔而作詩二子乘舟之詩是也于是壽閔其兄之且見害作憂思之詩黍離之詩是也又使伋之齊將使盜見載旌要而殺之壽止伋伋曰棄父之命非子道也不可壽又與之偕行壽之母知不能止也因戒之曰壽無爲前也壽又爲前竊伋旌以先行幾及齊矣盜是而殺之伋至見壽之死痛其代已死涕泣悲哀遂載其屍還至境而

自殺兄弟俱死故君子義此二人而傷宣公之聽讒也
容齋隨筆宣公以魯隱公四年十二月立至桓公十二
年十一月卒凡十有九年姑以卽位之始便成烝亂而
伋子卽以次年生勢須十五歲然後取旣取而奪之又
生壽朔朔能同母譖兄壽又能代使越境非十歲以下
所能辦也最爲難曉

世本古義鄒氏云夷姜固莊公妾而衛宣非與其父莊
公爲代者洪氏殆考之未悉莊卒而桓立十三年入春
秋至魯隱四年則衛桓十六年矣其春桓爲州吁所弑
乃自衛人殺州吁而宣公晉以是冬立然則晉之烝夷
姜而生伋子當在其兄桓公之世及宣卽位計伋年且

言上卷第一
長因以爲世子新臺之築距此時亦或不遠其十九年
間所生壽朔或已幾弱冠壽之能代兄使而朔之能同
母愬兄固無足怪

人表考衛太子伋左傳曰急子母夷姜公子壽左傳曰
壽子衛世家曰子壽母宣姜

按新序說詩事不同以黍離爲壽所作困學紀聞謂
魯詩出于浮邱伯以授楚元王交劉向乃交之孫其
說蓋本魯詩然黍離王風之首恐不可以爲壽作也
鄘風

柏舟

共姜小序

陸德明曰共姜共伯之妻也婦人從夫諡姜姓也

共伯

小序

古今人表列下下作衛共伯

共伯名餘僖侯之世子未立卒諡法敬事供上曰共
史記釐侯卒太子共伯餘立爲君共伯弟和有寵于釐
侯多與之賂和以其賂賂士以襲攻共伯于墓上入釐
侯羨自殺衛人因葬之釐侯旁諡曰共伯

正義曰言衛世子者依世家共伯死時釐侯已葬入釐
侯羨自殺則未成君故繫之父在之辭言世子以別于
衆子共諡伯字以未成君故不稱爵共伯死時去髦久
矣仍云兩髦者追本父母在之飾

困學紀聞呂成公曰衛武公在位五十五年國語又稱

武公年九十有五猶箴儆于國計其初卽位其齒蓋已四十餘矣使果弑共伯而篡立則共伯見弑之時其齒又加長于武公安得謂之蚤死乎髦者子事父母之飾史記謂釐侯已葬而共伯自殺則是時共伯已脫髦矣安得猶謂髦彼兩髦乎是共伯未嘗有見弑之事武公未嘗有篡弑之惡也

繹史言共伯蚤死非立而和殺之也蘇子由古史云武公賢者無奪嫡之事

世本古義共伯一作恭伯名餘恭其諡也共伯娶齊武公之女

牆有茨

公子頑小序

鄭箋宣公卒惠公幼其庶兄頑烝于惠公之母生子五人齊子戴公文公宋桓夫人許穆夫人

正義曰閔二年左傳初惠公之卽位也少齊人使昭伯烝于宣姜不可強之生齊子戴公文公宋桓夫人許穆夫人服虔云昭伯衛宣公之長庶伋之兄

陸德明曰頑宣公庶子昭伯名也

桑中

孟姜 孟弋 孟庸

按世本古義孟長女也姜齊姓始于神農居姜水因以爲氏弋杞女姓案春秋定姒公穀作定弋然則弋

妣同一姓蓋杞女夏后氏之後庸本鄆姓之國漢有庸光及膠東庸生是其後也古或作庸蘇轍云姜弋庸皆著姓刺無禮則稱孟言雖長而忘禮也美有禮則稱季曰有齊季女言雖幼而知好禮也

定之方中

衛文公小序 古今人表列中下

文公名燬新書作燬昭伯之子戴公之弟在位二十五年諡

法慈惠愛民曰文

鄭箋春秋閔二年冬狄人入衛衛懿公及狄人戰于滎澤而敗宋桓公迎衛之遺民渡河立戴公以廬于漕戴公立一年而卒魯僖公二年齊桓公城楚邱而封衛于

是文公立而建國焉

正義曰閔二年左傳狄人伐衛戰于熒澤衛師敗績及敗宋桓公逆諸河宵濟衛之遺民男女七百有三人益之以共滕之民爲五千人立戴公以廬于漕世家云戴公申元年卒復立其弟文公二十五年文公卒然則狄人以十二月入衛懿公死其月戴公立而卒文公以此年冬立戴公立未踰年不成君稱諡者以衛旣滅而立不繫于先君故臣子成其喪而爲之諡

史記初翟殺懿公也衛人憐之思復立宣公前死太子伋之後伋子又死而代伋死者子壽又無子太子伋同母弟二人其一曰黔牟嘗代惠公爲君八年復去其二

曰昭伯皆已前死故立昭伯子爲戴公卒復立其弟燬爲文公文公初立輕賦平罪身自勞與百姓同苦以救衛民

韓非子衛君入朝于周周行人問其號對曰諸侯辟疆周行人却之曰諸侯不得與天子同號衛君乃自更曰諸侯燬而後內之仲尼聞之曰遠哉禁偪虛名不以借人况實事乎

人表考衛文公昭伯烝宣姜生名燬史集解本書孝文紀顏注引賈竝作燬而今本作燬字書不載錢大昭以燬乃焜之訛詩玉室如燬說文引作焜後書列女傳注引韓詩亦作焜與燬同

按僖十九年春秋書衛人伐邢左氏云報菟圃之役
張洽曰衛不自省其從宋伐喪之罪而以報復爲事
罪之也二十五年春秋書衛侯燬滅邢左氏云衛侯
燬滅邢同姓也故名公羊云衛侯何以名絕曷爲絕
之滅同姓也穀梁云燬之名何也不正其伐本而滅
同姓也據閔二年左傳云僖之元年齊桓公遷邢于
夷儀二年封衛于楚邱脣齒相依卒至邢衛交惡遂
以滅邢文公衛之賢君興復之功炳于一時乃以滅
同姓故致于春秋生名之貶惜哉

齊桓公

白序

古今人表列中中作齊桓公小

齊桓公名小白僖公之子在位四十三年諡法辟土服

遠曰桓

莊八年左傳僖公之母弟曰夷仲年生公孫無知有寵于僖公衣服禮秩如適襄公紂之二人因之以作亂遂弑之而立無知初襄公立無常鮑叔牙曰君使民慢亂將作矣奉公子小白出奔莒亂作管夷吾召忽奉公子糾來奔九年雍廩殺無知夏公伐齊納子糾桓公自莒先入秋師及齊師戰于乾時我師敗績鮑叔帥師來言曰子糾親也請君討之管召讎也請受而甘心焉乃殺子糾于生竇

穀梁傳齊公孫無知弑襄公公子糾公子小白不能存出亡齊人殺無知而迎公子糾于魯公子小白不讓公

子糾先入又殺之于魯故曰齊小白入于齊惡之也
說苑齊桓公使管仲治國管仲對曰賤不能臨貴桓公
以爲上卿而國不治桓公曰何故對曰貧不能使富桓
公賜之齊國市租一年而國不治桓公曰何故對曰疏
不能制親桓公以爲仲父齊國大安而遂霸天下

史記齊桓公旣霸會諸侯于葵邱而欲封禪管仲曰古
者封泰山禪梁父者七十二家而夷吾所記者十有二
焉昔無懷氏封泰山禪云云慮羲封泰山禪云云神農
封泰山禪云云炎帝封泰山禪云云黃帝封泰山禪亭
亭顓頊封泰山禪云云帝佶封泰山禪云云堯封泰山
禪云云舜封泰山禪云云禹封泰山禪會稽湯封泰山

禪云云周成王封泰山禪社首皆受命然後得封禪桓公曰寡人北伐山戎過孤竹西伐大夏涉流沙東馬懸車上卑耳之山南伐至召陵登熊耳山以望江漢兵車之會三而乘車之會六諸侯莫違我昔三代受命又何以異乎管仲曰古之封禪鄒上之黍北里之禾所以爲盛江淮之閒一茅三脊所以爲藉東海致比目之魚西海致比翼之鳥然後物有不召而自至者十有五焉今鳳皇麒麟不來嘉穀不生而欲封禪毋乃不可乎桓公乃止

淮南子桓公立政去食肉之獸食粟之鳥係罝之網三舉而百姓說

韓非子桓公微服而行于民間有鹿門稷者行年七十而無妻桓公曰何以令之有妻管仲曰上有積財則民臣必匱乏于下宮中有怨女則有老而無妻者桓公曰善令于宮中女子未嘗御出嫁之乃令男子年二十而室女年十五而嫁

呂氏春秋管仲有疾桓公往問之曰仲父之疾病矣將何以教寡人管仲曰願君之遠易牙豎刁常之巫衛公子啟方管仲死盡逐之三年復召而返公病常之巫從中出曰公將以某日薨易牙豎刁常之巫相與作亂塞宮門築高牆不通人矯以公令衛公子啟方以書社四十下衛公慨焉歎涕出曰死者有知我將何面目以見

言上族卷第一
仲父平蒙衣袂而絕乎壽宮蟲流出于戶上蓋以楊門
之扇三月不葬

史記桓公病五公子各樹黨爭立及桓公卒遂相攻以
故宮中空莫敢棺桓公尸在牀上六十七日蟲出于戶
十二月乙亥無詭立乃棺赴辛巳夜殮殯桓公十有餘
子要其後立者五人無詭立三月死次孝公次昭公次
懿公次惠公

人表考齊桓公衛姬之子在位四十三年葬齊城南二
十里女水西水經注元和志云在臨淄縣東南二十三
里鼎足山上

按皇侃云桓公是齊僖公之庶子子糾是桓公之庶

兄又云僖有三子長襄公次子糾是庶小者名小白則糾兄桓弟其序明甚而殺兄自立桓罪固難末減然得國以後信任管仲倡霸中原考困學紀聞引崔氏曰莊十六年九國盟于幽二十七年五國又盟于幽僖元年六國會于榿二年四國盟于貫五年八國會王世子于首止七年五國盟于甯母八年王人與七國會于洮九年宰周公與七國會于葵邱十三年七國會于鹹凡九合諸侯也其霸績之盛至于不以兵車而尊周抑楚懾服諸侯其亦不讓古之方伯矣惜乎王室不競一君一臣經營四十年而克濟焉迨管仲死而桓之晚節漸衰桓公沒而諸侯乃競啟兵

端君子是以信管仲之賢而追美桓公之績不得不傷天下之無霸也

載馳

許穆夫人

小序

古今人表列中中作許夫人

鄭箋許穆夫人公子頑烝于宣姜所生

列女傳許穆夫人者衛懿公女初許求之齊亦求之懿公將與許女因其傅母而言曰古者諸侯之有女子也所以繫援于大國也今許小而遠齊大而近如使邊境有寇戎之事控告大國妾在不猶愈乎衛侯不聽其後翟人攻衛大破之而許不能救許夫人馳驅而弔唁衛侯因疾之而作詩君子善其慈惠而遠識也

世本古義衛宣公先娶夷姜生太子伋公子黔牟公子頑已又娶齊女是爲宣姜生壽及朔其後伋壽俱爲盜所殺以朔爲太子是爲惠公惠公卒子赤立是爲懿公初惠公之卽位也齊人使頑烝于宣姜生齊子戴公文公宋桓夫人許穆夫人及懿公在位九年爲翟所殺衛人思立伋壽之後而皆無子先是惠公四年黔牟作亂代惠公爲尹八年諸侯放之于周及頑皆已前死至是乃立頑子申爲戴公以輩行論之許穆夫人雖宣姜所出而實懿公之從妹以爲懿公女者非也

按許男爵穆公名新臣見春秋僖四年許穆夫人是公子頑烝于宣姜所生鄭說是也

衛懿公

小序

古今人表列下中

衛懿公

論衡作哀公

名赤惠公子在位九年諡法溫柔賢善

曰懿

閔二年左傳狄人伐衛衛懿公好鶴鶴有乘軒者將戰國人受甲者皆曰使鶴鶴實有祿位余焉能戰及戰于熒澤衛師敗績遂滅衛衛侯不去其旗是以甚敗

新書衛懿公喜鶴有飾以文繡而乘軒者賦斂繁多而不顧其民貴優而輕大臣羣臣或諫則面叱之及翟伐衛寇挾城堞矣衛君垂泣而拜其臣民曰寇迫矣士民其勉之士民曰君亦使君之貴優將君之愛鶴以爲君戰矣我儕小人也安能守戰乃潰門而出走寇遂入衛

君奔死遂喪其國

呂氏春秋衛懿公有臣曰宏演有所于使翟人攻衛其民曰君之所予位祿者鶴也所富貴者宮人也君使宮人與鶴戰余焉能戰遂潰而去翟人至及懿公子熒澤殺之盡食其肉獨舍其肝宏演至報使于肝畢呼天而啼曰臣請爲禪因自殺先出其腹實內懿公之肝桓公聞之曰衛之亡也以爲無道也今有臣若此不可不存于是復立衛于楚邱

許人

春秋譜許姜姓與齊同祖堯四嶽伯夷之後周公封其苗裔文叔于許靈公徙棄悼公遷夷又居析許男斯處

容城自文叔至莊公十一世始見春秋

衛風

淇奥

武公

小序

古今人表列中下作衛武公

衛武公名和僖侯之子共伯之弟在位五十五年謚法厥彊獻德曰武

史記武公卽位修康叔之政百姓和集人表考武公和周平王命爲公故亦曰衛武侯年九十有五猶箴儆于國其沒謂之獻聖武公

按序言武公入相于周孔疏謂毛傳于卒章曰重較卿士之車則入相爲卿士也賓之初筵序武公旣入

而作是詩則武公當幽王之時已爲卿士矣又世家云武公將兵佐周平戎甚有功平王命爲公則平王之初未命爲公亦爲卿士矣序言入相于周不斥其時之王或幽或平未可知也若平王則爲公而云卿士者卿爲典事公其兼官

又按楚語云昔衛武公年九十有五矣猶箴儆于國曰自卿以下至于師長苟在朝者無謂我耄而捨我于是乎作懿以自儆韋昭曰懿詩大雅抑之篇也抑讀曰懿抑序謂衛武公刺厲王亦以自警正義引史記衛世家云武公者僖侯之子共伯之弟以宣王三十六年卽位則厲王之世武公時爲諸侯之庶子耳

未爲國君未有職事善惡無豫于物不應作詩刺王
然則武公于宣王之世卽位至幽王時始入而爲卿
也

考槃

莊公

小序

古今人表列中下作衛嚴公

衛莊公名揚

侯表世家
並作揚

武公之子在位二十三年諡法

勝敵克亂曰莊

按莊公棄莊姜之賢而寵幸嬖人以州吁之驕縱好
兵不知教以義方而反有使將之命卒啟弑亂之階
是詩又刺莊公不能繼先公之業以上有武公之賢
正當修德任賢仔承舊緒乃近替前徽家聲弗紹然

則莊公于父子夫婦間無克盡其道矣

碩人

齊侯

古今人表列下上作齊嚴侯

齊侯齊莊公也名購史表作贖成公之子在位六十四年諡法勝敵克亂曰莊

東宮

毛傳東宮齊太子也

齊莊公太子得臣

世本古義東宮太子所居之宮杜預云太子不敢居上位故常處東宮孔穎達云四時東爲春萬物生長在東西爲秋萬物成就在西以此君在西宮太子常處東宮也易象西北爲乾乾爲君父故君在西東方震震爲長

男故太子在東也左傳東宮名得臣孔云齊世家莊公
生僖公東宮得臣未知何公太子案史記年表衛莊公
之立在春秋前二十五年齊僖公之立在春秋前八年
得臣爲太子蚤死故僖公得立也

邢侯

按說文邢周公子所封國括地志亦云周公子封邢
侯馬驕周世系圖周公子凡八人伯禽君陳凡伯蔣
邢侯茅胙祭伯然則周公始封之時邢固侯爵也後
爲衛所滅

譚公

正義曰春秋譚子奔莒則譚子爵言公者蓋依臣子之

稱

世本古義譚國名路史云嬴姓譚本子爵而得稱公者
白虎通云伯子男臣子于其國中褒其君爲公以爲諸
侯有會聚其事相朝聘之道稱公而尊故皆令臣子得
稱其君爲公也

按白虎通譚作覃云覃子也說文鄆國也齊桓公之
所滅从邑覃聲臣鉉等曰今作譚非是說文註義有
譚長當是同音通用

芄蘭

惠公

小序

古今人表列中下作衛惠公朔

衛惠公名朔宣公之子在位十二年諡法柔質受課曰

惠

正義曰閔二年左傳惠公之卽位也少杜預云蓋年十五六以傳言初衛宣公烝于夷姜生伋子爲之娶于齊而美公娶之生壽及朔言爲之娶于齊則宣公已卽位也宣公以隱四年冬立假令五年卽娶齊女至桓十二年見經凡十九年而朔尙有兄壽則宣公卽位三四年始生惠公故疑爲十五六也

桓十六年左傳二公子故怨惠公十一月左公子洩右公子職立公子黔牟惠公奔齊莊五年冬伐衛納惠公也六年夏衛侯入放公子黔牟于周放甯跪于秦殺左公子洩右公子職乃卽位君子以二公子之立黔

牟爲不度矣

公羊傳衛侯朔何以名絕曷爲絕之犯命也其言入何篡辭也

穀梁傳其不言伐衛納朔何也不逆天王之命也入者納弗受也何用弗受也爲以王命絕之也朔之名惡也朔入逆則出順矣朔出入名以王命絕之也

史記宣公卒太子朔立是爲惠公左右公子不平朔之立也惠公四年左右公子怨惠公之讒殺前太子伋而代立乃作亂攻惠公立太子伋之弟黔牟爲君惠公奔齊衛君黔牟立八年齊襄公率諸侯奉王命共伐衛納惠公誅左右公子衛君黔牟奔于周惠公復立惠公立

三年出亡亡八年復入與前通年凡十三年

詩緝衛自宣公殺伋壽朔爲世子代立左右公子作亂立黔牟惠公奔齊其後諸侯納惠公黔牟奔周惠公怨周之容黔牟與燕伐周立子頹爲王惠公奔溫及惠公卒子懿公立百姓大臣猶以殺伋之故皆不服翟乘其隙殺懿公而滅衛嗚呼衛之亂極矣

釋史按左氏朔立四年出亡亡八年復入通年十二年史遷云十三年旣與左氏不同復與上數不合年表十年復入也宣公旣沒黔牟者急子之母弟也以次當嗣爲君矣二公子不以此時拒朔使其竊位四載然後逐之是何也公羊氏曰朔得罪于天子也然則惠之初立

二公子雖欲圖之尙無其間今也開釁王室正罪有辭
抗義援立因隙爲功逆朔之罪天下共聞柰何五國之
師受寶助亂王人不競竟使佩觿之童子賊守正之親
臣二子不幸無功非其立君之不度也
世本古義惠公以穉年卽位聽其母與庶兄通而不能
禁亦可謂無知之甚者矣

河廣

宋襄公

小序

古今人表列中下

宋襄公名茲父

公羊作慈父

桓公之子在位十四年諡法辟

地有德曰襄甲冑有勞曰襄

說苑宋襄公茲父爲桓公太子桓公有後妻子曰公子

目夷公愛之茲父爲公愛之也欲立之請于公曰請使
目夷立臣爲之相兄以佐之公曰何故對曰臣之舅在
衛愛臣若終立則不可以往絕迹于衛是背母也且臣
自知不足以處目夷之上公不許強以請公許之將立
公子目夷目夷辭曰兄立而弟在下是其義也今弟立
而兄在下不義也不義而使目夷爲之目夷將逃乃逃
之衛茲父從之三年桓公有疾使人召茲父若不來是
使我以憂死也茲父乃返公復立之以爲太子然後目
夷歸

詩補傳宋襄公之母卽宋桓夫人衛文公之妹也生襄
公而見出以其子襄公之在宋也故思而不止然則非

思宋也思其子也宋襄公之爲太子也嘗請立目夷曰臣之舅在衛臣若終立則不可以往託舅爲言思其母也宋襄公之母子可謂慈孝兩盡矣

僖九年左傳宋襄公卽位以公子目夷爲仁使爲左師以聽政于是宋治 二十二年楚人伐宋以救鄭宋公及楚人戰于泓宋人旣成列楚人未旣濟司馬曰彼衆我寡及其未旣濟也請擊之公曰不可旣濟而未成列又以告公曰未可旣陳而後擊之宋師敗績公傷股門官殲焉 二十三年夏五月宋襄公卒傷于泓故也 韓非子宋襄公與楚人戰涿谷上襄公曰今楚未濟而擊之害義請使楚畢涉成陳而後鼓士進之右司馬曰

言上苑卷第一
君不愛宋民腹心不完特爲義耳公曰不反列且行法
右司馬反列楚人已成列撰陳矣公乃鼓之宋人大敗
公傷股三日而死

二
繹史宋桓公之立也適當北杏之會齊桓之霸首在得
宋自兩鄆以來每會先從三十餘年宴然無事襄公乘
數十年休養之餘未見齊霸之盛而會逢其衰鹹也淮
也牡邱也非不身從然而救徐不克謀鄆不成襄公心
竊易之以爲取而代之無難也于是執滕用鄆伐曹圍
曹一歲之中三國交病乃爲鹿上之盟以求諸侯于楚
嗚呼抑愚矣中國之所患者唯楚蕞爾宋國輒欲狎主
齊盟乎楚人佯許而實誘之秋執冬釋宋之無君也閱

三月矣顧猶不悟以至傷身辱國楚賴不逞得肆志以
窺上國者宋襄啟之也初公之立也以子魚爲左師自
是以來每事必諫倘能用其一言猶堪振禍曷爲知其
仁而不聽其謀剛愎自信固敗是求宋之不亡也幸耳
列之五霸不亦惡乎

人表考宋襄公桓公太子母衛文公女弟昭伯女名茲
父立十四年與楚戰傷股七月而死葬承匡襄陵

按宋襄公處父母兄弟之間恂恂孝友固春秋時所
罕及惜其拙于謀國虛擁仁義之名而卒無以救敗
也

王風

君子于役

平王

小序

古今人表列下下作平王宜曰

平王名宜曰

晉語作咎

幽王之子在位五十一年諡法執事

有制曰平

古文瑣語幽王將殺太子宜曰立伯服釋虎將執之宜曰叱之虎弭耳而伏

史記周幽王用褒姒廢太子立褒姒子爲適數欺諸侯諸侯叛之西戎犬戎與申侯伐周殺幽王酈山下秦襄公將兵救周周避犬戎東徙維也襄公以兵送周平王平王立東遷之時周室衰微諸侯彊并弱齊楚秦晉始大政由方伯

竹書紀年幽王死申侯立平王于申虢公立王子余二王並立余爲晉文侯所殺是爲攜王

李樛曰太子宜臼平王也且曰申后之子也幽王旣愛褒姒生子伯服遂廢申后以伯服爲太子遂逐宜臼左傳云至于幽王天不弔周王昏不若用愆厥位攜王奸命諸侯黜之而建王嗣用遷郊鄩攜王指伯服也王嗣指宜臼也詳左氏之文則是幽王旣死伯服自立故謂之攜王諸侯黜之而立王嗣也

人表考案左傳有攜王竹書幽王弒後宜臼立申虢公翰立王子余臣于攜二王竝立者二十年晉文侯殺之其立較宜臼爲正史漢俱不書晉語韋注左傳杜注及

世族譜以攜王爲伯服皆誤

免爰

桓王

小序

古今人表列下上作桓王林

桓王名林平王之孫太子洩父之子在位二十三年諡法辟土服遠曰桓

桓十五年左傳天王使冢父來求車非禮也諸侯不貢車服天子不私求財

人表考史周紀平王太子洩父蚤死故立孫二十三年崩葬河南澠池縣東北百二十里

按周桓公言周之東遷晉鄭焉依而鄭桓公武公尤有功于王室及桓王卽位而先自貳鄭隱三年以周

人將舁號公政致使鄭人取麥取禾之不已六年鄭伯如周始朝王而王又不禮欲善鄭以勸來者固如是乎十一年王取蔦劉蔦邗之田于鄭而與鄭人蘇忿生之田桓王之失鄭有由來也迨至桓五年王奪鄭伯政鄭伯竟不朝矣繻葛之戰敢于射王中肩大敗王卒君臣之分安在雖鄭居號檜恃險可虞惜王無以善處之至于構怨連禍甘蹈不臣之罪爲春秋所共誅君子以是罪鄭莊公卽以閔周也

巳中有麻

莊王

小序

古今人表列中下作嚴王佗

莊王名佗桓王之子在位十五年諡法勝敵克亂曰莊

桓十八年左傳周公欲弑莊王而立王子克辛伯告王
遂與王殺周公黑肩王子克奔燕初子儀有寵于桓王
桓王屬諸周公辛伯諫曰竝后匹嫡兩政耦國亂之本
也周公弗從故及

人表考莊王名佗周語注作它杜世族譜作他稽古錄
作仲譌

按周室之亂起于竝后匹嫡而姦人乘之以爲利在
昔攜王干位王室播遷幾于不祀乃猶不鑒子克之
謀由于桓王之寵若非辛伯先識亂本而早除其害
不且爲國大患乎

畱子嗟

毛傳畱大夫氏子嗟字也

曹氏曰畱本邑名其大夫以爲氏

李樗曰彼留子嗟毛氏鄭氏蘇氏皆以爲留姓惟歐陽不以爲姓若以爲大夫之姓則莊王之事跡見于春秋史記當時大夫留氏無所聞于人其被放逐亦不見其事何從而知之此說不然邱中有麻所謂彼畱子嗟者亦猶陳風所謂子仲之子豈必求于他書有子仲乃言其姓氏乎蓋詩中所陳便是實事跡不必于春秋史記中而求之也

陳啟源毛詩稽古編說文無劉字有留字徐鍇以爲留卽劉當是也通作留周大夫采地因氏焉子國子嗟以

父子而世賢皆著名于東周不知誰之裔且受邑在何王之世也羅泌以爲堯長子考監明之後是不然留乃東周畿內邑緱氏縣有劉聚者是堯之後在夏世已有劉累其來舊矣不以周邑氏也厥後八十餘年而留邑復爲王季子采地是爲劉康公豈子嗟之遭放逐併失其爵邑乎

留子國

毛傳子國子嗟父

鄭箋言子國著其世賢

按留姓出會稽本衛大夫留封人之後吳志有左將留贊其又子國子嗟之苗裔與

又按世本古義以是詩爲刺鄭桓公桓公處于留與
鄆君夫人叔妘通焉詩人託爲叔妘之辭以醜之引
公羊傳鄭國處于留先鄭伯有善于鄆公者通乎夫
人以取其國而遷鄭焉而野留又路史云畱國陶唐
氏之後妘姓愚案留後入于鄭或先爲王所滅而以
之封鄭或鄭自取之孟康云留鄭邑後爲陳所并故
曰陳留留子卽鄭伯也隱其國爵而以留子呼之蓋
自醜其行而忌諱之意姑備一說

詩氏族考卷第一

詩氏族考卷第二

嘉興 李超孫 輯

鄭風

緇衣

武公

小序

古今人表列下上作鄭武公

鄭武公名掘突桓公之子在位二十七年諡法剛彊直理曰武

史記犬戎殺幽王于驪山下并殺桓公鄭人共立其子掘突是爲武公

隱三年左傳鄭武公莊公爲平王卿士

正義曰武公之與桓公父子皆爲周司徒之卿諸侯有

言上力者卷二
德乃能入仕王朝

韓非子昔者鄭武公欲伐胡故先以其女妻胡君以娛其意因問于羣臣吾欲用兵誰可伐者大夫關其思對曰胡可伐武公怒而戮之曰胡兄弟之國也子言伐之何也胡君聞之以鄭爲親已遂不備鄭鄭人襲取之人表考鄭武公名攷周語注杜世族譜史表並作滑突譙周又作突滑父子並爲周司徒故竹書稱司徒鄭伯周語單稱武立二十七年

按鄭武公養賢而賦緇衣子曰于緇衣見好賢之至篇中稱子卽指武公也諸侯卽位未踰年改元稱子將仲子

莊公

小序

古今人表列下中作鄭嚴公寤生

鄭莊公名寤生武公之子在位四十三年諡法勝敵克亂曰莊

隱元年左傳初鄭武公娶于申曰武姜生莊公及共叔段莊公寤生驚姜氏故名曰寤生遂惡之

李樛曰春秋書鄭伯克段于鄆穀梁釋之曰何甚乎鄭伯甚鄭伯之處心積慮成于殺也莊公以大邑封之俟其惡積之深而後誅之以免天下之議春秋書之見其肺肝矣

釋史鄭伯已嗣先君而有國善事母而友愛厥弟段也不才夫豈不可教諫乃姜之所愛莊滋不能容與之制

則曰巖邑懼其阻險而難制也與之京則使居之庶乎
處大都以驕其志因以蔽罪焉莊段同母之子以武姜
言之處鄭而爲君母亦復何求而啟弟殺兄事之未集
厥謀先漏處京而京人叛奔鄆而鄆不保設能母子陰
慮合謀當不輕舉速禍如是也鄭伯處心積慮以成其
殺于以正告天下則曰段將襲我也姜將啟段也莊之
按兵未動先邀愛弟之名闕地而賦大隧以爲天性之
樂母子如初也孰其信之

按鄭莊公狡詐性成自絕于人道繻葛一戰是無君
也寘城潁而誓黃泉是絕母也失教以成其惡克段
之舉是棄弟也然則莊公一春秋之罪人也

仲子

古今人表列中中作鄭祭足

毛傳仲子祭仲也

桓五年左傳鄭伯使祭足勞王十五年祭仲專鄭伯患之使其壻雍糾殺之將享諸郊雍姬知之遂告祭仲曰雍氏舍其室而將享子于郊吾惑之以告祭仲殺雍糾尸諸周氏之汪

杜預曰祭足卽祭仲之字蓋名仲字仲足也

世本古義仲子祭仲也名足仲其字鄭大夫也其先爲祭封人因以爲氏

人表考祭仲易林作蔡仲左傳曰祭仲足亦曰祭封人仲足祭鄭地釋文名仲字足葬密縣邢山

按桓十一年左傳祭封人仲足有寵于莊公莊公使爲卿杜注陳畱長垣縣東北有祭城封人掌封疆者因以所守爲氏夫祭仲恃權專恣周鄭交質之不已又帥師取溫之麥取成周之禾繻葛一戰君臣之義亡矣仲又不諫反爲左拒以敗王卒鄭已立世子忽矣以宋公欲立突而執己乃與宋人盟以厲公歸而立之是仲廢忽也祭仲殺雍糾厲公出奔蔡恃畏祭仲害己耳齊侯師于首止討高渠彌之弑昭公而立公子亶也齊人殺子亶仲遂逆子儀于陳而立之人以祭仲稱疾不往爲智不知其懼罪而倖免也然則祭仲一專國脅君之賊耳詩曰人之多言亦可畏也

所以懼之者深矣公羊傳曰祭仲者何鄭相也何以不名賢也何賢乎祭仲以爲知權也祭仲不能死難黜君納賊其權何可爲訓公羊賢之爲失當矣

叔于田

叔

古今人表列下中作叔段

毛傳叔太叔段也

正義曰太叔其字曰叔以寵祿過度時呼爲太叔左傳謂之京城太叔是由寵而異其號也

毛詩集解黃樵曰管蔡與商人同濟其惡則商人必以管蔡爲賢共叔段與京人叛則國人必以段爲仁且武此如安祿山史思明乃唐室之賊而范陽之人以爲二

聖也

人表考叔段莊公弟左傳曰太叔曰太叔段曰共叔段曰京城太叔曰共叔亦單稱段後書曰鄭叔潛夫論作恭叔墓在衛州共城縣

大叔于田

按段稱太叔據左傳在封京之後則受寵異之號擁人民兵甲之衆不得出居閭巷下雜民伍前篇乃謂巷無居人當是未受封時事故篇名但以叔稱是篇以莊公旣封叔段于京號爲京城太叔故名太叔于田則受封後事也

清人

文公

小序

古今人表列中下作鄭文公接

鄭文公名捷厲公之子在位四十五年諡法慈惠愛民曰文

宣三年左傳初鄭文公有賤妾曰燕姑夢天使與已蘭既而文公見之與之蘭而御之生穆公名之曰蘭

人表考鄭文公名接公羊作接

古从木从手通寫

左穀周語侯

表竝作捷

古字通

世家作蹠左傳亦曰鄭捷立四十五年

按鄭自公子五爭忽儀臺各一而子突兩立鄭之困

于兵革屢矣文公于惠王五年立十二年侵許十七

年棄其師觀于春秋所書而文公之失見矣李迂仲

曰慶賞刑威人主之柄高克有罪則當戮之于市朝

言上放者卷第二
如其罪小則竄逐之可也何乃委而棄之至于不召
平後漢耿公爲敵所圍公卿以爲不宜救鮑昱議曰
今使人于危難之地急而棄之如復犯塞爲寇陛下
何以取將今鄭文公之于高克如其後有難則何以
使將兵乎其不亡者幸矣此言是也

高克

小序

古今人表列下上作鄭高克

閔二年左傳鄭人惡高克使帥師次于河上久而弗召
師潰而歸高克奔陳鄭人爲之賦清人

公羊傳鄭棄其師者何惡其將也鄭伯惡高克使之將
逐而不納棄師之道也
杜預曰高克鄭大夫也

正義曰高克志好財利見利而不顧其君文公惡而欲
遠離之乃使將兵禦狄于境久而不召公羊傳云大夫
以君命出進退在大夫然則高克禮當自還不須待召
而文公不召久留河上者其戰伐進退自由將帥若罷
兵還國必須君命故不召不得歸也

人表考高克釋文作剋或謂克是渠彌子

公子素

小序

古今人表列下上作公孫素

正義曰鄭公子名素惡高克進之事君不以禮又惡文
公退之逐臣不以道乃是危國亡師之本故作清人之
詩以刺之

人表考公孫素公孫當作公子據詩序素卽作詩刺鄭

文公高克者陳鱣詩人考曰春秋傳莊十四年莊公之子八人杜注傳惟見四人子忽子亶子儀竝死獨厲公在八人名字記傳無聞顧炎武補正云桓十四年鄭伯使其弟語莊公來盟傳稱其字子人蓋其一也此公子素疑亦莊公八人之一于文公爲叔父故所作之詩君臣同責與

按正義第云文公有臣鄭之公子名素者其氏字殆無可考

有女同車

太子忽

小序 古今人表列下上作鄭昭公忽

忽鄭昭公名也莊公世子厲公之兄諡法昭德有勞曰

昭

桓十一年左傳初祭封人仲足有寵于莊公使爲卿爲公娶鄧曼生昭公故祭仲立之宋雍氏女于鄭莊公曰雍姑生厲公雍氏女有寵于宋莊公故誘祭仲而執之曰不立突將死祭仲與宋人盟以厲公歸而立之秋九月丁亥昭公奔衛己亥厲公立十五年祭仲殺雍糾厲公出奔蔡六月乙亥昭公入

韓非子鄭伯將以高渠彌爲卿昭公惡之固諫不聽昭公立懼其殺己也辛卯弑昭公而立公子亶君子曰昭公知所惡矣

李樗曰據鄭莊公卒太子忽立宋人乃執鄭祭仲出忽

而立突突雍姑之子也雍氏有寵于宋莊公故宋人執祭仲而立突是突得大國之助而忽無大國之助所以見逐詩人推原其見逐之由蓋本于辭齊之昏嘗觀古賢人君子亦有辭昏者劉德妻死霍光欲以女妻之德不敢畏盛滿也又欲妻鮪不疑固辭不敢當若二子者可謂善避禍者矣卒之霍禹謀不軌霍氏之壻如鄧廣漢范明友皆不得其死然則知辭昏若二子者然後爲善也劉鮪之辭昏乃免于禍忽之辭昏乃所以召禍至于公子互爭兵革不息國人皆不得保其室家也

人表考鄭昭公忽說文作習春秋經曰世子忽亦曰鄭忽左傳曰太子忽史傳曰昭君莊公娶鄧曼所生立二

年

按正義引桓六年左傳北戎侵齊齊侯使乞師于鄭
鄭太子忽帥師救齊大敗戎師獲其二帥大良少良
甲首三百以獻于齊是太子忽嘗有功于齊也傳又
云公之未昏于齊也齊侯欲以文姜妻鄭太子忽太
子忽辭及其敗戎師也齊侯又請妻之固辭人問其
故太子曰無事于齊吾猶不敢今以君命奔齊之急
而受室以歸是以師昏也民其謂我何遂辭諸鄭伯
如左傳文齊侯前欲以文姜妻忽後復欲以他女妻
忽再請之此言齊女賢而忽不娶謂復請妻者非文
姜也謂之孟姜者假言其賢長以美之隱八年左傳

鄭公子忽如陳逆婦媯則是已娶正妻矣齊侯所以得請妻者春秋之世不必如禮或陳媯已死忽將改娶二者無文以明之竊謂祭仲曾勸忽娶于齊以爲太國之援何以昭公之逐卽由祭仲其出奔衛也不得不罪祭仲之反覆不臣且以惜昭公之無援也

山有扶蘇

子都

按隱十一年左傳杜注子都鄭大夫公孫闕也字子都以美麗稱初鄭祭仲專權鄭伯使其壻雍糾殺之祭仲知之與其黨子都殺雍糾而逐厲公厲公反國欲殺雍糾之徒莊十六年左傳鄭伯治與于雍糾之

亂者九月殺公子闕

卽公孫闕

是其事也

子充

按孟子稱子都之姣毛傳亦云子都世之美好者則與孟子合若子充傳第以爲良人正義謂性行充塞良善之人案豐氏坊謂子都乃公孫闕字子充乃瑕叔盈字皆世族之賢者豐坊僞說雖不足據然考隱十一年左傳公會齊侯鄭伯伐許潁考叔取鄭伯之旗螯弧以先登子都自下射之顛瑕叔盈又以螯弧登周麾而呼曰君登矣鄭師畢登遂入許杜注瑕叔盈鄭大夫則此與子都皆鄭卿之勇而有將略者以是斥昭公之狂狡而思見此兩人其說似相脗合

齊風

雞鳴

哀公

小序 古今人表列下中作齊哀公

齊哀公名不辰

世本作不臣

癸公之子太公四世孫諡法蚤

孤短折曰哀

竹書紀年哀公名昴周夷王三年致諸侯翦齊哀公昴
史記哀公時紀侯譖之周周烹哀公

困學紀聞詩譜序懿王始受譖烹齊哀公夷王失禮之
後卽不尊賢正義謂變風之作齊衛爲先齊哀公當懿
王衛頃公當夷王故先言此也

世本古義哀公未有所考韓詩以爲說人也其義未詳

按莊四年公羊傳史記齊世家但言周烹哀公不斥何王惟詩譜及正義指爲周懿王公羊世家竹書又謂周夷王徐廣亦云周夷王烹之懿王至夷王中間僅歷孝王一世是時王世不長故未易遽定與

南山

襄公

小序 古今人表列下下作齊襄公兒

齊襄公名諸兒

人表似傳寫脫諸字

僖公之子在位十二年諡法

甲冑有勞曰襄

漢書襄公淫亂姑姊妹不嫁于是令國中民家長女不得嫁名曰巫兒爲家主祠

繹史齊僖小伯雄長東方而國儲無世子之教愛女無

公宮之訓文姜一嫁兩國行穢春秋病襄兼以病僖也
按襄公以魯桓十五年立莊八年冬春秋書齊無知
弑其君諸兒左氏言其田于貝邱見大豕從者曰公
子彭生也公怒射之豕人立而啼公懼隊車遂死于
門中自襄公數與文姜通致使彭生搯殺桓公魯人
因是請除彭生彭生之殺其禍蓋起于襄公好淫所
致然則公之見弑未始非彭生怨氣鬱結而爲此祟
也信乎天道惡淫厥報豈有爽哉

齊子

古今人表列下下作夫人文姜

毛傳齊子文姜也

齊僖公之女襄公之妹

桓三年左傳會于嬴成昏于齊也秋公子翬如齊逆女

齊侯送姜氏非禮也冬齊仲年來聘致夫人也 十八
年公會齊侯于濼遂及文姜如齊齊侯通焉 莊元年
春不稱卽位文姜出故也三月夫人孫于齊不稱姜氏
絕不爲親禮也

管子魯桓公夫人文姜齊女也公將如齊與夫人皆行
申俞諫公不聽文姜通于齊侯

莊二十一年穀梁傳夫人姜氏薨婦人弗目也

世本古義據左傳先是齊僖公欲以女文姜妻鄭太子
忽太子忽辭想文姜爲室女之日內行已不正矣忽所
謂齊大非耦蓋權辭也桓竟取之國人知其婦道之必
不終也

按文姜以桓三年歸魯十八年卽如齊與齊侯通桓公謫之致羅彭生搯殺之禍莊二年春秋書夫人姜氏會于禚矣四年又享齊侯于祝邱五年又如齊師七年又會齊侯于防會于穀矣以齊僖之女魯莊之母而瀆穢若此論者徒歸其咎于莊公然謂子不能防母豈知夫不能制婦之罪在桓公乎魯三世通昏于齊僖十一年春秋書公及夫人姜氏會齊侯于陽穀汪氏克寬曰桓公如齊稱公與姜氏此稱及則僖公猶能防制云爾魯頌稱聲姜爲令妻是聲姜必無文姜之行也易恆卦曰閑有家悔亡其信然矣

敝笱

魯桓公

小序

古今人表列下下

魯桓公名軌

史記作允

惠公之子隱公之弟在位十八年諡

法辟土服遠曰桓

左傳惠公元妃孟子孟子卒繼室以聲子生隱公宋武
公生仲子仲子生而有文在其手曰爲魯夫人故仲子
歸于我生桓公而惠公薨是以隱公立而奉之 隱十
一年羽父請殺桓公將以求太宰公曰爲其少故也吾
將授之矣使營菟裘吾將老焉羽父懼反譖公于桓公
而請弑之十一月公祭鍾巫齋于社圃館于蔦氏羽父
使賊弑公于蔦氏立桓公 十八年春公及文姜如齊
齊侯通焉公謫之以告夏四月享公使公子彭生乘公

公薨于車

人表考桓公名軌世家作允又作子允又作元惠公子立十八年齊襄公享公醉使公子彭生抱上車搯幹而殺之薨于車

按桓公弑兄自立則兄弟之道廢弑立而用卽位之禮假同于遭喪繼位者則君臣之義薄御廩召災非時而舉嘗祭則非所以敬祖文姜之得通襄公實始于樂之會公與姜氏遂如齊以啟瀆亂之端則非所以帥婦其不克善終也宜哉

猗嗟

魯莊公

小序

古今人表列下上作魯嚴公同

魯莊公名同桓公之子在位三十二年諡法勝敵克壯曰莊

莊元年左傳春不稱卽位文姜出故也

慎子魯莊公鑄大鐘曹劌入見曰今國褊而鐘大君何不圖之

按桓六年春秋書九月丁卯子同生左氏稱其以太子生之禮舉之公與文姜宗婦命之且曰是其生也與我同物命之曰同公羊傳曰何言乎子同生喜有正也穀梁傳曰疑故志之然考春秋十二公唯子同生是嫡夫人之長子劉原父曰子同生何以書貴也何貴爾世子也詩人信魯莊公爲齊侯之甥豈聖人

反疑爲齊侯之子乎就令當時國人有疑之者是國惡無大于此矣聖人曷爲明揭之乎竊謂夫人姜氏于桓三年至自齊六年子同生至十八年夫人始如齊豈可疑莊公爲齊侯之子乎公羊于莊元年又謂夫人譖公于齊侯公曰同非吾子齊侯之子也說固矛盾穀梁疑之亦非詩序云人以爲齊侯之子而鄭箋則據詩曰我甥謂是拒時人言齊侯之子其義乃明

又按莊二十三年左傳夏公如齊觀社秋丹桓宮之楹二十四年春刻其桷秋哀姜至公使宗婦覲用幣左氏皆以非禮譏之公之觀社所以縱游觀棄國政

罪已具見而丹楹刻桷又以將迎夫人故爲盛飾哀
姜之娶在魯爲讎女而納幣圖昏又在母喪未再期
之時及哀姜旣至使大夫宗婦同贊俱見欲以奢夸
夫人其不能正身率禮如此異日淫縱弑逆之禍殆
勢之所必至也

唐風

蟋蟀

晉僖公

小序

古今人表列中下作晉釐侯

晉僖公

史記作釐侯

名司徒靖侯之子在位十八年諡法小

心畏忌曰僖

人表考左傳曰晉僖侯

按晉僖公之立當周共和二年攝行王事天下帖然至十四年爲宣王靖元年幸際中興之主復睹太平僖公恪守舊封儉節自持不敢逸樂惜乎閱四年而遽卒享國不久諡之曰僖洵克副小心畏忌之實矣
山有樞

晉昭公

小序

古今人表列下中作晉昭侯

晉昭公名伯文侯之子在位七年諡法威儀恭明曰昭左傳曰晉昭侯潘父弑之

按惠王二十四年晉始亂封靖侯之孫桓叔于曲沃欒賓傅之師服曰晉甸侯也而建國本旣弱矣其能久乎惠之三十年晉潘父弑昭侯而納桓叔不克迨

昭公封桓叔于沃必非一邑鵠亦其旁邑也使專有之不復屬晉宜其日益盛強詩人于其始封已知晉國必爲桓叔所有故三章皆以宛其死矣憫之而以他人惕之他人謂桓叔也

又按史記稱晉昭侯七年晉大臣潘父弑其君昭侯而迎曲沃桓叔桓叔欲入晉晉人發兵攻桓叔桓叔敗還歸曲沃孝侯十五年曲沃莊伯弑其君孝侯于翼晉人攻莊伯復入曲沃鄂侯六年卒曲沃莊伯乃興兵伐晉周平王使虢公將兵伐莊伯莊伯走保曲沃又紀年云鄂侯五年莊伯以曲沃叛伐翼公子萬救翼荀叔軫追之至于家谷翼侯焚曲沃之禾而還

翼侯伐曲沃大捷武公請成于翼至相而還哀侯三年荀人董伯皆叛曲沃竊謂曲沃封邑雖大于國然自桓叔一敗于晉繼以莊伯三敗武公又因敗請成是時有方伯連帥得專征伐何難乘其敗而殲除之何至養惡縱姦潘父作難于內而昭侯弑焉旣而孝侯鄂侯莊伯弑之哀緡小子侯武公弑之遂以并晉三世濟惡驕恣罔忌實自昭公時兆其禍也

揚之水

沃

古今人表列下下作曲沃桓叔

曲沃桓叔名成師穆侯之子

史記昭侯元年封文侯弟成師于曲沃曲沃邑大于翼

翼晉君都邑也成師封曲沃號爲桓叔靖侯庶孫欒賓相桓叔桓叔是時年五十八矣好德晉國之衆皆附焉君子曰晉之亂其在曲沃矣

正義曰桓叔雖受封于晉非天子之命天子不賜以爵桓叔莊伯皆以字配諡蓋雖君其國未有爵命左傳每云曲沃伯或可自稱伯也

詩緝時沃有篡國之謀潘父將爲內應而昭公不知此詩正發其謀以警昭公也若眞欲從沃則是潘父之黨必不作此以泄其事且自取戾也

詩補傳穆公之子成師昭公之叔父也昭公以沃之大邑封成師已無遠慮且不知人矣詩人刺之與祭仲諫

鄭莊公封叔段于京之事類也

按桓二年左傳初晉穆侯之夫人姜氏以條之役生太子命之曰仇其弟以千畝之戰生命曰成師師服曰異哉君之名子也嘉耦曰妃怨耦曰仇古之命也今君命太子曰仇弟曰成師始兆亂矣兄其替乎然則成師命名之始已兆亂萌師服可謂識微知著者矣

無衣

晉武公

小序

古今人表列下中作曲沃武公

晉武公名稱莊伯之子三十七年滅晉二年而卒諡法剛彊直理曰武

史記哀侯二年曲沃莊伯卒子稱代立是爲曲沃武公
釐王命曲沃武公爲晉君已卽位三十七年矣更號曰
晉武公始都晉國代晉二年卒與曲沃通年卽位凡三
十九年

正義曰左傳桓八年王使立緡于晉至莊十六年乃云
王使虢公命曲沃伯爲晉侯不言滅晉之事晉世家云
哀侯二年曲沃莊伯卒晉侯緡立二十八年曲沃武公
伐晉侯緡滅之盡以其寶器賂周僖王僖王命曲沃武
公爲晉君列爲諸侯于是盡并晉地而有之武公已卽
位三十七年矣計緡以桓八年立至莊十六年乃得二
十八年然則虢公命晉侯之年始并晉也

待軒詩記以左傳史記考之平王二十六年晉昭侯封成師于曲沃專封而王不問一失也三十二年潘父弑昭侯欲納成師而王又不問二失也四十七年曲沃莊伯弑孝侯而王又不問三失也桓王二年莊伯攻晉王非特不能討曲沃反使尹氏武氏助之及曲沃叛王王尙能命虢公伐曲沃立晉哀侯使其初出于正豈至于此乎四失也十五年武公弑晉小子侯明年猶能命虢仲立緡于晉又明年命虢仲率諸侯伐曲沃至是武公篡晉僖王反受賂命之五失也以此五失觀之則禮樂征伐移于諸侯降于大夫竊于陪臣所由來者漸矣人表考武公左傳曰曲沃伯史記竹書曰武公稱滅晉

周釐王命爲晉侯前卽位曲沃三十八年代晉二歲通四十年卒

按左傳桓二年稱魯惠公三十年晉潘父弑昭侯而納桓叔不克晉人立孝侯惠之四十五年曲沃莊伯伐翼翼侯奔隨秋王命虢公伐曲沃而立哀侯于翼隱六年翼人逆晉侯于隨納諸鄂晉人謂之鄂侯桓二年鄂侯生哀侯哀侯侵陘庭之田陘庭南鄙啟曲沃伐翼桓三年曲沃伯武誘晉小子侯殺之八年春滅翼冬王命虢仲立晉哀侯之弟緡于晉觀于亂及五世而武公卒以并晉莊十六年王使虢公命曲沃伯以一軍爲晉侯雖曰國小故一軍勢亦寢熾矣

葛生

晉獻公

小序

古今人表列下中

晉獻公名詭諸武公之子在位二十六年諡法博聞多能曰獻

正義曰獻公以莊十八年立僖九年卒左傳莊二十八年稱晉伐驪戎驪戎男女以驪姬閔元年晉侯作二軍以滅耿滅霍滅魏二年晉侯使太子申生伐東山臯落氏僖二年晉師滅下陽五年八月晉侯圍上陽冬滅虢又執虞公八年晉里克敗狄于采桑是好攻戰也人表考晉獻公名詭諸左公穀竝作侂諸楚辭抱朴子曰晉獻莊子稱爲王立二十六年葬絳縣東槐泉邨一

統志寰宇記云冢在濠州定遠縣東去驪姬冢十步
按左傳莊二十八年晉獻公娶于賈無子烝于齊姜
生秦穆夫人及太子申生則穢亂甚矣至于蠱惑驪
姬既殺太子申生又聽其譖以逐二公子父子之倫
數矣此采芣之詩所以刺其好聽讒也

詩氏族考卷第二